

Broj: 05-02/2-2412/21 EZ  
Sarajevo, 04.10.2021. godine

**BOSNA I HERCEGOVINA  
FEDERACIJA BOSNE I HERCEGOVINE  
VLADA FEDERACIJE BOSNE I HERCEGOVINE  
n/r g-đe Kalajdžić Edite, sekretara Vlade**

Bosna i Hercegovina  
Federacija Bosne i Hercegovine  
**PARLAMENT FEDERACIJE  
SARAJEVO**

Primijeno: 08-10-2021

Org. jed.	Broj	Priloga	Vrijednost
05/2	- 02 -	261	/21

**PARLAMENT FEDERACIJE BOSNE I HERCEGOVINE  
DOM NARODA**  
n/r g-din Hadžiavdzić Izmira, sekretara Doma naroda  
n/r g-đe Imširević Sandre, delegatkinje

**Predmet:** Odgovor na delegatsko pitanje, **dostavlja se,**

**Veza:** Akt sekretara Doma naroda Parlamenta Federacije BiH broj: 05/2-02-261/21 od 07.09.2021. godine i akt sekretara Vlade Federacije BiH broj: 03-04-1083-3/21 od 10.09.2021. godine

Poštovane/i,

Na osnovu akata veze, dostavljamo Vam odgovor na delegatsko pitanje koje je podnijela na 12. sjednici Doma naroda Parlamenta Federacije BiH, održanoj dana 29.07.2021. godine, delegatkinja Imširević Sandra.

**Pitanje glasi:** U kojoj su fazi zakoni iz oblasti socijalne zaštite?

**Odgovor:** Planom rada Vlade Federacije BiH za 2021. godinu, iz nadležnosti Federalnog ministarstva rada i socijalne politike, planirana je izrada sljedećih propisa iz oblasti socijalne zaštite:

- Izrada Prijedloga zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom;
- Izrada Prijedloga zakona o podršci porodicama s djecom u Federaciji Bosne i Hercegovine;
- Izrada Prednacrt zakona o socijalnim uslugama u Federaciji Bosne i Hercegovine;
- Izrada Prednacrt zakona o ustanovama socijalne zaštite Federacije Bosne i Hercegovine;
- Izrada Prednacrt zakona o izmjenama i dopunama Zakona o hraniteljstvu u Federaciji Bosne i Hercegovine;
- Izrada Prednacrt zakona o djelatnosti socijalnog rada u Federaciji Bosne i Hercegovine;



- Izrada Prednacrt zakona o psihološkoj djelatnosti u Federaciji Bosne i Hercegovine;
- Izrada Zakona o psihološkoj djelatnosti u Federaciji Bosne i Hercegovine

S tim u vezi dostavljamo Vam kratki pregled aktivnosti Ministarstva koje se odnose na izradu navedenih propisa:

- Izrada Prijedloga zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom planirana je kako bi se sistemski i na sveobuhvatan način riješilo pitanje statusa roditelja njegovatelja. Porodice odnosno roditelji koji imaju dijete s invaliditetom, u velikom broju slučajeva, sami preuzimaju ulogu i posao njegovatelja, stručnjaka i odgajatelja svoje djece, pri čemu im je onemogućeno osnovno pravo na rad zbog potrebe da svojoj djeci osiguraju 24-satnu brigu i njegu. Umjesto predloženih izmjena i dopuna predmetnog Zakona pristupilo se izradi posebnog Zakona o roditeljima njegovateljima u Federaciji Bosne i Hercegovine, koji je usvojio Parlament Federacije BiH i koji će se primjenjivati od 2022. godine.
- Nakon provedene javne rasprave o Nacrtu zakona o podršci porodicama s djecom u Federaciji Bosne i Hercegovine, pripremljen je tekst Nacrta zakona o podršci porodicama s djecom u Federaciji Bosne i Hercegovine koji je dostavljen nadležnim kantonalnim ministarstvima za oblast socijalne i dječije zaštite radi pribavljanja mišljenja. Ovim zakonom se uređuju osnove materijalne podrške porodicama s djecom, utvrđuju se materijalna prava za podršku porodicama s djecom (dječji dodatak i novčana pomoć porodilji koja nije u radnom odnosu), postupak ostvarivanja prava, uslovi i način za ostvarivanje prava, finansiranje materijalne podrške porodicama s djecom, nadzor i druga pitanja od značaja za ostvarivanje podrške porodicama s djecom u Federaciji Bosne i Hercegovine. Nacrtom se predlaže finansiranje prava na dječiji dodatak iz budžeta Federacije Bosne i Hercegovine, kao jedini način da se obezbijedi dostupnost i ujednačenost ovog prava na cijeloj teritoriji Federacije, nezavisno od kantona u kojem korisnik ima prebivalište.
- Prednacrt zakona o ustanovama socijalne zaštite Federacije Bosne i Hercegovine usvojen je od strane Predstavničkog doma Parlamenta Federacije BiH. Trenutno se čeka na razmatranje predmetnog Zakona u Domu naroda Parlamenta Federacije BiH. Ovim zakonom uređuju se djelatnost i korisnici usluga ustanova socijalne zaštite Federacije Bosne i Hercegovine, osnovni i posebni standardi u pogledu obavljanja njihove propisane djelatnosti i zaštite prava smještenih korisnika, organi upravljanja, nadzora i rukovođenja, finansiranje, nadzor nad radom, te druga pitanja od značaja za rad i funkcionisanje ustanova socijalne zaštite Federacije Bosne i Hercegovine.
- Nakon provedenih javnih konsultacija koje su zvanično otpočele dana 08.04.2021. godine, kada je putem on line platforme i medija, Zakon o socijalnim uslugama prezentiran svim zainteresiranim subjektima (centri za socijalni rad, ustanove socijalne zaštite, NVO, kantonalna ministarstva itd.) izrađen je Prednacrt zakona o socijalnim uslugama u Federaciji Bosne i Hercegovine koji je dostavljen kantonalnim ministarstvima nadležnim za oblast

socijalne i dječije zaštite na mišljenje. Zakonom o socijalnim uslugama u Federaciji Bosne i Hercegovine na jedinstven način uređuju se vrste socijalnih usluga, njihovo osiguranje i modalitet finansiranja, standardi pod kojima se iste pružaju, nadzor, licenciranje pružatelja usluga, kao i druga pitanja od značaja za ostvarivanje prava na socijalne usluge u Federaciji BiH.

- U planu rada Federalnog ministarstva rada i socijalne politike jeste i izrada Prednacrt zakona o socijalnoj djelatnosti u Federaciji Bosne i Hercegovine. Navedenim zakonom bi se razvili određeni mehanizmi za licenciranje stručnih radnika u djelatnosti socijalnog rada u Federaciji BiH, definirala obavezna područja edukacije kao i supervizija. Urađena je procjena uticaja Zakona o djelatnosti socijalnog rada u Federaciji Bosne i Hercegovine, te su u toku aktivnosti na izradi Prednacrt zakona.
- U okviru postupka evaluacije i revizije učinaka Javne politike o razvoju hraniteljstva u Federaciji Bosne i Hercegovine i Zakona o hraniteljstvu u Federaciji Bosne i Hercegovine („Službene novine Federacije BiH“, broj 19/17), te u skladu s dosadašnjom primjenom Zakona, ovo ministarstvo prikupilo je od općinskih i kantonalnih organa socijalnog staranja, prijedloge izmjena i dopuna Zakona o hraniteljstvu u Federaciji Bosne i Hercegovine. U toku su aktivnosti na izradi Prednacrt zakona o izmjenama i dopunama Zakona o hraniteljstvu u Federaciji Bosne i Hercegovine.
- Prednacrt zakona o psihološkoj djelatnosti u Federaciji Bosne i Hercegovine dostavljen je na mišljenje nadležnim institucijama u skladu s članom 27. Poslovnika o radu Vlade Federacije Bosne i Hercegovine – prečišćen tekst („Službene novine Federacije BiH“, br.6/10, 37/10, 62/10, 39/20 i 67/21).

Na kraju naglašavamo da je neophodno imati u vidu činjenicu da je Ustavom Federacije BiH socijalna politika u nadležnosti federalne i kantonalnih vlasti te da se socijalna zaštita finansira s nivoa kantona. Zbog navedenog u realizaciji planiranih aktivnosti ovog ministarstva moguće je naići na probleme vezane za nepružanje podrške od strane kantona prilikom donošenja ovih propisa, kao i probleme vezane za osiguranje finansijskih sredstava potrebnih za njihovo provođenje.

S poštovanjem,



Dostavljeno:

- Naslovu
- Sektoru za socijalnu zaštitu i zaštitu porodice i djece
- a/a